



Headline: Waspada, bersatu tangani skim penipuan Macau Scam
Publication/Portal: Berita Harian
Date: 29 August 2018

Language: Malay
Section: Surat
Page: 77

Waspada, bersatu tangani skim penipuan Macau Scam

Adakah masyarakat Malaysia berada dalam keadaan terdesak? Sejak beberapa minggu, laman media sosial penuh dengan rungutan orang ramai mengenai kewujudan kembali Macau Scam.

Walaupun sindiket ini telah lama bertapak di negara ini, namun, sehingga kini kewujudannya masih tidak mampu dibendung.

Sindiket ini sebenarnya didalangi oleh warga tempatan dan warga asing yang membuat panggilan telefon secara rambang dengan mendakwa mewakili mana institusi kewangan dan agensi kerajaan yang terbabit dalam pengeluaran saman atau kompaun.

Jika dulu mereka membuat panggilan rawak, sejak beberapa bulan lalu, mereka sudah bijak dalam mendapatkan nombor telefon daripada direktori agensi kerajaan dan juga swasta.

Dalam masa dua bulan ini, penulis menerima dua panggilan daripada kumpulan Macau Scam. Panggilan pertama kononnya datang dari bank komersial, iaitu satu

panggilan mesin automatik.

Perkara yang pelik mengenai panggilan ini ialah dibuat daripada nombor talian mudah alih. Setahu penulis, pihak bank tidak pernah menggunakan nombor talian mudah alih untuk melakukan panggilan melalui mesin.

Pegawai palsu

Penulis dikehendaki menekan nombor yang diberikan untuk bercakap dengan talian perkhidmatan pelanggan. Setelah menekan nombor yang diberikan, penulis akhirnya dapat bercakap dengan pegawai khidmat pelanggan palsu.

Seperkara yang menarik ialah pegawai palsu ini tidak dapat bercakap dengan menggunakan bahasa Melayu yang fasih serta bunyi latar belakang seakan-akan menunjukkan pegawai palsu ini berada di tepi jalan.

Sewajarnya panggilan ini dilakukan dalam pejabat yang lebih sunyi dan profesional. Setelah mendengar bunyi latar belakang yang mencurigakan, penulis meletakkan talian.

Panggilan kedua pula masih datang dari nombor talian mudah alih dan kali ini pula panggilan diterima dari Polis Diraja Malaysia mengenai saman tertunggak. Sekali lagi, penulis berasa pelik mengapa pihak polis menggunakan nombor talian mudah alih yang disambungkan dengan mesin. Penulis terus meletakkan telefon.

Penulis bersyukur kerana mempunyai ilmu berkenaan skim penipuan melalui telefon dan atas talian. Bagaimana pula dengan suri rumah dan juga orang tua kita di kampung?

Mereka ini jarang mendapat maklumat mengenai skim sebegini. Bayangkanlah mereka menerima panggilan telefon yang menyatakan bahawa mereka berhutang ratusan ribu ringgit.

Sudah pasti mereka akan panik dan sudah pasti mereka akan membuat sedikit pembayaran kepada sindiket ini jika mereka digugut. Siapakah yang bertanggungjawab untuk memberikan ilmu mengenai kewujudan skim seperti ini?

Beberapa hari lalu, penulis menerima panggilan telefon daripada individu yang konon mempunyai anak di sekolah yang penulis menjadi Yang Dipertua Persatuan Ibu Bapa dan Guru (PIBG).

Proses lelongan barangan

Individu itu menyatakan bahawa beliau ingin menyumbangkan tiga buah komputer kepada sekolah. Selang beberapa saat, beliau minta izin untuk menelefon sebentar lagi kerana bunyi latar belakang yang terlalu bisik.

Beberapa minit kemudian individu itu menelefon kembali dan meminta maaf kerana bunyi latar belakang yang bisik.

Beliau menyatakan beliau bekerja dengan Kastam Diraja Malaysia dan ketika itu berlaku proses lelongan barang rampasan seperti telefon bimbit, komputer dan televisyen.

Beliau ada bertanya dengan penulis sama ada berminat untuk memesan barang itu daripada beliau kerana beliau akan hadir ke sekolah membawa barang berke-

naan bersama-sama komputer yang ingin disumbangkan.

Penulis menghidu bau penipuan di situ dan menyatakan dengan hormat bahawa penulis tidak berminat untuk membeli barang rampasan. Setelah meletakkan telefon, penulis menghantar mesej ke kumpulan WhatsApp PIBG daerah untuk bertanyakan mengenai perkara berkenaan. Amat mengejutkan kerana kebanyakan daripada mereka telah menerima panggilan yang sama.

Akhir sekali, sebagai masyarakat Malaysia, kita perlulah bersatu hati untuk menentang skim penipuan seperti ini daripada terus berleluasa. Kita faham betapa perit untuk mendapatkan pendapatan halal dan tentu merugikan jika pendapatan itu hangus akibat penipuan ini.

Mohammad Noorizzuddin Nooh,

Pensyarah Fakulti Ekonomi dan Muamalat, Universiti Sains Islam Malaysia